

# Agid da la Svizra als pajais en svilup

Evaluaziun da la lavur

DA LUCAS DEPLAZES / ANR

■ **En la sessiun d'atun passà ha il parlament federal deliberà la missiva davart l'agid da la Svizra als pajais en svilup. El ha concedi in credit dad 11,6 milliardas francs per ils onns 2017–2020. Il parlament vul dapli trasparenza dals meds finanzials mess a disposiziun.** En la discussiun davart l'agid als pajais en svilup ha il parlament giavischà d'era conuscher l'effect da la lavur e dals meds finanzials che la Svizra metta a disposiziun per l'agid internaziunal, ha punctuà *Manuel Sager*, il schef da la direziun da svilup e da collavuraziun (DSC). La missiva metta ils accents sin tschintg finamiras strategicas, ha accentuà il directur a chaschun da la conferenza annuala da medias a Berna.

## 70 milliuns fugitivs

Var 70 milliuns personas han stuì bandunar lur patria e sa chattan actualmain en la situaziun precara da fugitivs, ha fatg attent Sager. La mesadad da quellas èn uffants e giuvenils. Perquai ha mess il cussegl federal la prioritad sin l'agid urgent en territoris da crisa e da catastofas, concret vul quai dir en l'Orient Proxim ed en l'Africa dal nord. Ils meds finanzials persuerter vegnan augmentads da 45 sin 55 procent. En il medem temp s'engaschia la DSC er en process da schliar conflicts



**Manuel Sager, directur dal DEZA (dretg) e Peter Bieler, responsabel tar il DEZA per evaluaziun e controlling a chaschun da la conferenza da pressa.**

KEYSTONE

e tar accziuns da mediaziun. Per quests intents han ins augmentà il credit per 120 milliuns francs, ha menziunà Sager. In engaschi pli ferm vul DSC er realisar en contexts fragils en l'Africa sin il sector da la scolaziun e furmaziun professiunala per pudair offrir ina perspeciva a las generaziuns giuvnas. Ina ulteriura finamira è da cumbatter la paupradad e la malgistadad tranter umens e dunnas. 70% da las personas en extrema paupradad sajan

dunnas, han constatà ils experts. In engaschi global succeda en ils secturs aua, midada dal clima, sanadad e migraziun. En l'avegnir duai funcziunar meglier la coordinaziun tranter ils divers departaments (Seco, partizun per la segirtad ed uffizi da migraziun). La confederaziun sustegna er divers projects d'organiziuns privatas.

En il context cun la problematica da l'agid als pajais en svilup stat er la delica-

ta dumonda da l'agid als pajais che refusan d'acceptar lur agens fugitivs che n'han betg obtegnì il dretg d'asil e ston returnar en lur patria. La pretensiun da stritgar l'agid a tals pajais è la fallada via, ha fatg attent Sager. Ina tala mesira muntass in chasti per il pievel e serrass l'isch a la collavuraziun cun la regenza pertutgada. Mintga project vegn elavurà ed examinà cun la regenza, quai che lube-scha er a la Svizra da formular agens gia-

vischs davart la repatriaziun. Ina coordinaziun è plinavant necessaria per evitar conflicts d'interess e da concorrenza cun ulteriurs pajais che s'engaschan per l'agid da svilup.

## Evaluaziun e controlling

*Peter Bieler*, il schef da la secziun evaluaziun e controlling, ha preschentà ils meds ed ils instruments per mesurar e per giuditgar l'effect da las stentas e da las mesiras da la lavur en ils divers pajais. Examinads vegnan onn per onn var 10 procent dals var 1200 projects en accziun. Las singulas evaluaziuns dals projects vegnan scrittas or e realisadas da firmas externas che disponan da l'experientscha sin quests secturs. Tenor Bieler èn las finamiras dals projects en 80 fin 85 procent vegnidas ademplitas. Davart ils 15% fin 20% ston mintgamai vegnir examinadas las premissas e las difficultads e sche inditgà procurà per correcturas. Impurtant saja d'integrar la populaziun en la lavur da project, da meglierar las cundiziuns da produczion e sin quella moda generar dapli d'entradas. La Svizra disponia da las experientschas necessarias, ha constatà Bieler. La stad proxima vegnian plinavant examinads ils divers programs en ils diesch pajais da l'ost da l'Uniu europeica che pon profitar da las contribuziuns da coesiun da la Svizra, ha menziunà Sager.